

## Kitsy nii pxaal Pable lo meñ nii no leñ kyedzy Roma

<sup>1</sup> Paablaa. Xtsiiñ Jesucrist xkyën. Lëë Dios kwtsyetsy naa parñee kakaa xapostle xaa parñee kluyaa tiits nii xteelaa.

<sup>2</sup> Penaadle bluuy Dios tiits re. Ndaly profet pkëew leñ kitsy nii kë xtiits Dios. <sup>3</sup> Lëë tiits re xñee cho nak Jesucrist, Xiñ Dios. Lo xtiy rey David sëed xaa. <sup>4</sup> Per por xkyalwnabey Kyalbini Ntson lëë xaa kok Xiñ Dios, porñee pañ xaa lo kyalkuty.

<sup>5</sup> Por Jesucrist lëë Dios bnee tiits nii kakaa apostle parñee tyub lo kislyu tso meñ nii kniladzy xtiits xaa ni ksoob xtiits xaa. <sup>6</sup> Lady meñ nii kwtsyetsy Dios jkab lo Jesucrist ngab to. <sup>7</sup> Lëë Dios xkëstyoo lëë do kchë do siñee no do leñ kyedzy Roma, ni lëë xaa kwle lëë do parñee jkab to xkyedzy xaa. Lëë lëesy Tat Tios dyon ni lëë lëesy Jesucrist kakni lëë do ni knee tiits nii mbëë kpañ do.

### *Lëë Pable xkokyeñ tsi Roma*

<sup>8</sup> Xtedyaa skizh lo Jesucrist ni lo Tat Tios por lëë do, por laañee xkaatyee chakyety to porñee xniladzy to xtiits Dios. <sup>9</sup> Aan lëë Dios chan nii tugak xsaladzyaa lëë do tsiñee chutiitsnin xaa. Xtsiiñ Dios xkyën. Tyub styoon xluyaa xtiits xiñ xaa. <sup>10</sup> Tugak xñabaa lo Dios nii knee xaa tiits kyely teedyaa lo do. <sup>11</sup> Por chakladzyaa kanaa to parñee jkaa do xkyalnsaak Dios tsiin kchosody styoo do, <sup>12</sup> sinak nii xñee ñe, parñee kchoobladzy lsa no styoo no porñee xniladzy no xtiits Dios.

<sup>13</sup> Beetsy, kol kaknan gaanoo nii ndaly vuilt kwlokyyeeñaa kyelyaa lo do, per xtejtyo tiits. Chakladzyaa kyelyaa parñee ktopaa kyalnsaak sinak nii xtopno stub lugar. <sup>14</sup> No nii kluyaa xtiits Dios lo kchë meñ, nikxe lo meñ nii no kyedzyo, nikxe gaa lo meñ nii no taño, nikxe lo meñ nyaaniw, nikxe gaa lo meñ ngueyo. <sup>15</sup> Por ngo nii xtee gaanaa kyely kluyaa xtiits Dios wi lo do nii no do leñ kyedzy Roma.

### *Xtiits Dios nii xteelaa*

<sup>16</sup> Xtelastyaa xtiits Dios nii xteelaa, por xkylwnabey Dios nako parñee kteelaaw kchë meñ nii xnildzyo. Klo meñ Israel telaa. Tsigore telaa meñ sit. <sup>17</sup> Lëe tiits re xñee nii lëe Dios xteelaa lëe no lo tol porñee xnildzy sye no xtiits xaa. Ni leñ kitsy kaa nii kë xtiits Dios xñee: “Por kyalwnildzy lëe xaa nii buen kpañ.”

### *Xtol meñ*

<sup>18</sup> Xtyon no nii lëe xcastigw ntseeb Dios sëed kpaar parñee ksaksi xaa kchë meñ yox ni meñ mal, por xlaady xtol kchë meñ go jkaasy xtiitsli Dios. <sup>19</sup> Aan nan meñ go cho nak Dios, por misme Dios bluuyo. <sup>20</sup> Schilo kak nyoo nii nyoody por kchë cos nii psaa Dios. Destye nii kwche kislyu kok nyoo nii lëe xaa nak Dios ni kyaaldy kaa xkylwnabey xaa. Por ngo nii kindy pe jkëelo meñ go. <sup>21</sup> Per nikxe xyuumbey meñ go Dios singo mod, chuuñ ksakty meñ go Dios ni xteejty meñ go skizh lo xaa. Al contrario cos nii pa xkiiñdysye sini kik meñ go, ni lëe xkylcheñ meñ go pkyey. <sup>22</sup> Nikxe nii xñee meñ go nii nyaani meñ go, per nguey meñ go. <sup>23</sup> Por lëe meñ go psaan xkylantson Dios nii xnitylody por

mdyo nii chak si chak chol meñ, ni por mdyo nii nyaa si nyaa mguñ, ni por mdyo nii chak si chak ma nii sob tap niy, ni ma nii xtyoopxax.

<sup>24</sup> Por ngo lëe Dios psaanladzy meñ go parñee kuuñtsyey meñ go kchë cos mal nii no styoo meñ go. Aan chuuñtsyey meñ go cos nii xkwii kyalto kchë xcombañer, <sup>25</sup> porñee xnilasty meñ go xtiitsli Dios, sink tiits xuuy xniladzy meñ go. Xsoxib meñ go lo kchë cos nii psaa Dios. Xsoxibty meñ go lo Dios nii psaw. Por lëe Dios xyal jkaa skizh tugak. Singo no nii kako.

<sup>26</sup> Por ngo lëe Dios psaanladzy meñ go parñee kuuñtsyey meñ go cos nii xkwii kyalto. Por axte wi kwnaa ptsëe xmod. Choni me saa kwnaa me. <sup>27</sup> Singo gak xaapkiy, chokidre xaa kwnaa, sink saapkiy xaa choki xaa. Chuuñtsyey xaa cos nii xkwii kyalto ksa saapkiy xaa, aan mban xtye xcuerp xaa castigw por cos mal nii chuuñtsyey xaa.

<sup>28</sup> Chaklastre xaa ksal xaa Dios, aan lëe Dios kaa psaanladzy xaa parñee kuuñtsyey xaa nii chigaldy kak. <sup>29</sup> Kchëlo cos mal no kik xaa, mal xaa, ngbiñ xaa, mbidy xaa, nweety bñech xaa, xtilyni xaa meñ, wnee xuuy xaa, ni wagw tiits kizh xaa. <sup>30</sup> Xñeenë xaa meñ, xtilyni xaa Dios, xekwty xaa lo meñ, nyaa xaa, chuuñtsyey xaa cos mal, ni xsoobty xaa xtiits pxosy xaa. <sup>31</sup> Chondy xaa tiits, chuñdy xaa cumplir xtiits xaa, xkëstyoody xaa meñ, xkombedy xaa styoo xaa. <sup>32</sup> Nan xaa nii lëe Dios xñabey kety kchë meñ nii chuuñtsyey ngo, per lëew chuuñtsyey xaa, aan axte xle xaa chan xaa meñ nii chuuñtsyeyo.

## 2

### *Lëe Dios chuñ kyalxtisy*

<sup>1</sup> Por ngo kindy pe jkëllool, lii nii xseel meñ, deelñee chootyee nakoo. Misme lii xtee kyo lii tsiñee xseel meñ, por chuuñtsyeyoo nii chuuñtsyey meñ. <sup>2</sup> Por ndon no nii tsiñee lëe Dios chuñ kyalxtisy, xsaksi xaa meñ nii chuuñtsyey kchë ngo. <sup>3</sup> Aan lii nii xseel chanoo nii chuuñtsyey meñ aan chuuñtsyeylo, ¿pe xsyakoo nayak nii stelaal lo xkyalwsaksi Dios? <sup>4</sup> ¿Pe xsyablyul xkyalndoladzy Dios nayak ni xpaciency xaa? ¿Xyeñdyoo nayak nii lëe xkyalndoladzy Dios xtsig lii lo xaa? <sup>5</sup> Per nguiedzy styool ni chaklastyoo ktikcheel styool lo Dios. Por ngo lëel xyuubre kyalnë par tse nii lëe Dios kiid kuñ kyalxtisy. <sup>6</sup> Lëe xaa kizh meñ según kchë nii beeñtsyey meñ. <sup>7</sup> Lëe Dios ktee kyalmbañ nii nitylody lo meñ nii tugak beeñtsyey kyalbuen ni tugak beeñ ksak Dios. <sup>8</sup> Per lëe xaa ksaksi meñ nyaa nii xsaldy tiitsli ni meñ ngoptol. <sup>9</sup> So kyalwsaksi ni kyalnë par kchë meñ nii chuuñtsyey kyalmal, klo par meñ Israel, tsigore par meñ sit. <sup>10</sup> Per lo meñ nii chuuñtsyey kyalbuen lëe Dios ktee kyalnsaak parñee mbëe kpañ meñ go. Klo gak lo meñ Israel ktee xaaw, tsigore lo meñ sit.

<sup>11</sup> Por lëdy wi Dios xkwe meñ. <sup>12</sup> Por kchë meñ sit nii beeñ tol aan nandy meñ go nii no xley Moisés, tsody ley tsiñee lëe meñ go kety. Per lëe xkyalxtisy meñ Israel nii beeñ tol kak sinak xñabey xley Moisés. <sup>13</sup> Por xtyelaady meñ nii xkëëtyag nii xñabey ley, sink meñ nii chuuñtsyey nii xñabey ley xtyelaa. <sup>14</sup> Per tsiñee lëe meñ nii nandy nii no ley chuuñtsyey nii xñabey ley, mismе meñ go xsa

ley. <sup>15</sup> Por kchë nii chuuñtsyey meñ go nyoo nii leñ styoo meñ go no ley. Ni misme gaa xkyalcheñ meñ go ksoli meñ go o ksyablyu gaa meñ go <sup>16</sup> tse nii lëë Dios ni lëë Jesucrist kuñ xkyalxtisy meñ según kchë nii no kik meñ. Lëë xtiits Dios nii xluuyaa xñee nii singo kako.

### *Meñ Israel ni xley Moisés*

<sup>17</sup> Per lii nii xñeel nii meñ Israeloo, ni xsyeeñoo xley Moisés ni xtaanoo Dios, <sup>18</sup> nanoo pe cos chakladzy Dios. Ni xluuy ley lool nii no nii kwel cos mbëë. <sup>19</sup> Xsyakoo nii lii kob ña meñ nii xñady lo ni ksaabini lo meñ nii so lo nguey. <sup>20</sup> Xsyakoo nii schilool kuuñ kseedyoo meñ nguey ni kñeel lo meñ mban, por nanoo nii lo xley Moisés kë kyalchak ni tiitsli. <sup>21</sup> Deelñee chuuñ kseedyoo meñ, ¿penak nii chuuñ kseejtyoo lii? Deelñee xluuyoo nii ndox kwan meñ, ¿penak nii xkwanoo? <sup>22</sup> Deelñee xñeel nii ndox tsoni meñ stu kwanaa o stu mguiy deelñee no tsiil meñ, ¿penak nii chuuñtsyeyoo singo? Deelñee xlëël chanoo mdyo, ¿penak nii xkwanoo nii no xiktoo mdyo? <sup>23</sup> Xtaanoo xley Moisés, per xsyablyul Dios tsiñee xsaldyoo ley go. <sup>24</sup> Nli gak nii xñee kitsy nii kë xtiits Dios: “Por lëë do, xñeenë meñ sit Dios.”

<sup>25</sup> Xkiiñ kyalwyobey palalsye deelñee xsaloo xley Moisés, per deelñee chuuñtsyeydyoo nii xñabey ley, pe nandy nii kwyobeyoo. <sup>26</sup> Per deelñee no xaa nii nobeydy aan chuuñtsyey xaa nii xñabey ley, sak cuent nii nobey xaa, nikxe nii nobeydy xaa. <sup>27</sup> Kchë xaa nii nobeydy xcuerp, per chuuñtsyey xaa nii xñabey ley, ksee kan lii. Por chuuñtsyeydyoo nii xñabey ley, nikxe nii xyeeño ni nobeyoo. <sup>28</sup> Por

lëdy laa klaasy kak no meñ Israel, ni lëdy xaktyee porñee nobey xcuerp now, <sup>29</sup> sink tyub styoo no no nii kak no meñ Israel, ni no nii tsobey styoo no. Këdy kchë ngo lo kitsy, sink styoo no now. Kchë xaa nii nak singo xsolidy chol meñ xaa, sink Dios xsoli xaa go.

### 3

<sup>1</sup> ¿Pe non dyon nii kak no meñ Israel, ni pe non nii tsobey no? <sup>2</sup> Nono gon. Por lo meñ Israel psaan Dios xtiits. <sup>3</sup> ¿Pe kok tsigo worñee pchooxso meñ Israel? ¿Pe ptsëe Dios lo xtiits nayak? <sup>4</sup> ¡Lëdyo gon! Tugak xñee Dios tiitsli nikxe kchë meñ xñee xuuy, por leñ kitsy nii kë xtiits xaa xñee:

Sak meñ nii bueenoo por kchë nii xñeel,  
ni mbëe kchukëel tsiñee kak kyalxtisy.

<sup>5</sup> Per deelñee por xtol no chak nyoo xkyalbuen Dios, ¿pe mal Dios porñee xsaksi xaa lëe no? No meñ xñee nii nliw. <sup>6</sup> Per ¡lëdyo gon! Por deelñee nyak mal Dios, ¿xa kuñ xaa kyalxtisy lo kislyu?

<sup>7</sup> Per deelñee xkiiñ xtiits xuuyaa parñee kak nyooore xtiitsli Dios, ¿penak tsigo xsyak xaa nii no xtolaa? <sup>8</sup> Deelñee nyako singo, ¿penak nii chuuñtsyeydy no cos mal parñee kiid cos buen? No meñ xñee nii ngo xluyaa par ksyablyu meñaa, per nongual ksaksi Dios meñ go.

#### *Kindy meñ buen*

<sup>9</sup> ¿Pe tyeesy no dyon? ¿Pe mastre nayak buen no que meñ sit? ¡Lëdyo gon! Por ndon no nii nikxe meñ Israel no, nikxe gaa meñ sit no, ña tol no no. <sup>10</sup> Leñ kitsy nii kë xtiits Dios xñee:

Kindy meñ buen,

ni tu meñ buen nody.

<sup>11</sup> Kindy meñ nii xyeñ,  
kindy cho kyub Dios.

<sup>12</sup> Kchësy meñ këtañ,  
kchësy meñ byab lo tol.  
Kindy cho kuñ kyalbuen,  
ni tu cho kindy.

<sup>13</sup> Nak yañ meñ sinak tu paa nii nyaly,  
con ludzy meñ xñee xuuy meñ,  
xvenen mëël xchoo chuw meñ.

<sup>14</sup> Nonsyke cos mal ni tiits në xchoo chuw meñ.

<sup>15</sup> Ligier xsyë meñ par kuty meñ,

<sup>16</sup> kchë nii chuuñtsyey meñ xnitylo ni xsaksi,

<sup>17</sup> nandy meñ xa tso mbëë meñ.

<sup>18</sup> Sinidy xkyalntseeb Dios kik meñ.

<sup>19</sup> Ndon gaa no nii kchë nii xñee xley Moisés, lo  
meñ nii sinalo xñeew, parñee kyoogw chuw kchësy  
meñ ni parñee kchësy meñ kyab lo xkyalxtisy Dios.

<sup>20</sup> Por ni tu tol ktsildy Dios porñee sinal meñ ley,  
por xaktyee parñee këë ley nii no xtol no xkiiñ ley.

### *Lëë no telaa por xtiits Jesucrist*

<sup>21</sup> Lëdy por ley telaa no, por lëë Dios bluuy nii no  
stu mod nii telaa no, aan kchë ngo xtyoon tsiñee  
xkab xley Moisés ni xlibre profet. <sup>22</sup> Lëë Dios  
xteelaa lëë no porñee xnildy no xtiits Jesucrist.  
Xkwedy xaa meñ, sink kchë meñ nii xnildy xtiits  
Jesucrist xteelaa xaa. <sup>23</sup> Por kchësy meñ no xtol ni  
kchësy meñ nche sit lo Dios. <sup>24</sup> Per por xkyalnsaak  
Dios lëë xaa xteelaa meñ singosy, porñee xnildy  
meñ xtiits Jesucrist. <sup>25</sup> Lëë Dios pso Crist parñee  
por xkyalkuty Crist kpily xtol no deelñee knildy  
no xtiits xaa. Aan lëëw kok singo parñee kak nyoo

nii buen Dios. Psaldy Dios tol nii beeñtsyey meñ tiemp <sup>26</sup> porñee kop xaa paciensy, nikle gaa nina nyoo nii buen Dios, por lëe xaa xteelaa kchë meñ nii xniladzy xtiits Jesús.

<sup>27</sup> ¿Pa byaan xkyalnyaa no tsigo? Lëew bichee gon. ¿Penak dyon bicheew? ¿Pe porñee chuuñtsyey no nii xñabey xley Moiséso? Lëdyo, sink porñee xniladzy no xtiits Jesucristo. <sup>28</sup> Xtyon no tsigo busy nii lëe Dios xteelaa meñ porñee xniladzy meñ xtiits Jesucrist. Xteelaady xaa meñ porñee chuuñtsyey meñ nii xñabey ley.

<sup>29</sup> ¿Pe xaktyee meñ Israel nayak xteelaa Dios? ¿Pe lëdy wi meñ sit nayak xteelaa xaa? Wi meñ sit gon xteelaa Dios, <sup>30</sup> por tugak Dios no. Lëe Dios xteelaa meñ nii xniladzy xtiits Jesucrist. Xkwenjty xaa deelñee nobey meñ o nobeydy kaa meñ. <sup>31</sup> ¿Pe porñee xniladzy no xtiits Jesucrist tsigo, lëe no ksyablyu xley Moisés? ¡Lëdyo gon!, sink lëe no xlisklaa ley.

## 4

### *Xkyalwniladzy Abraham*

<sup>1</sup> ¿Pe styeesy no tsiñee kseety no pxusykoltoo no Abraham? <sup>2</sup> Deelñee nyak Abraham tu xaa buen por xtsiñ xaa, nyo pe ndaan xaa, nixxe nii ndaandy xaa lo Dios. <sup>3</sup> ¿Pe lëdy nayak xñee kitsy nii kë xtiits Dios: “Bniladzy Abraham xtiits Dios, por ngo lëe Dios beeñ cuent nii buen xaa”? <sup>4</sup> Lëe nana, deelñee xkyë tu xaa tsiñ, chayjty xaa nii chazh xaa, sink nii nsëeb meñ lo xaa xkaa xaa. <sup>5</sup> Per deelñee no tu xaa nii xniladzy xtiits Dios nii xteelaa meñ lo tol, lëe Dios chuñ cuent nii buen

xaa porñee bniladzy xaa, nikxe nii beeñtsyeydy xaa ni tu cos par tsigal xaaw. <sup>6</sup> Lëe rey David xñee xa xle xaa nii xsaldy Dios xtol, sink chuñ Dios cuent nii buen xaa. <sup>7</sup> Chëb rey David:

Dichos meñ nii ptsily Dios xtol aan psaldy Dioso.

<sup>8</sup> Dichos meñ nii chuñdy cuent Dios xtol.

<sup>9</sup> ¿Pe par meñ nii nobeysye dyon nak kyalwle re, ote wi par meñ nii nobeydyo yak? Lëe noo bñeel gon nii lëe Dios beeñ cuent nii buen Abraham porñee bniladzy Abraham. <sup>10</sup> Per ¿pa wor dyon beeñ Dios cuent nii buen Abraham? ¿Pe loxsye kwyobey xaaw, ote klow yak? Klow. <sup>11</sup> Aan tsigore kwyobey Abraham parñee kak nyoo nii lëe Dios beeñ cuent nii buen xaa porñee bniladzy xaa xtiits Dios. Por ngo lëe Abraham byak pxosy kchësy meñ nii nobeydy nii xnildzy xtiits Dios, ni por ngo lëe Dios chuñ cuent nii wi meñ go buen. <sup>12</sup> Ni lëe Abraham nak pxosy meñ nii nobey nii xnildzy xtiits Dios sinak nii bnildzy Abrahamo worñee karty tsobey xaa.

### *Lëe tiits nii psaan Dios chak cumplir*

<sup>13</sup> Lëe Dios chëb lo Abraham nii lëe xaa kyaani kislyu kchë meñ lidzy xaa. Per chëbty Dios ngo porñee beeñtsyey Abraham nii xñabey xley Moisés, sink porñee bnildzy Abraham xtiits Dioso ni porñee beeñ Dios cuent nii buen xaaw. <sup>14</sup> Por deelñee xaktyee meñ nii chuuñtsyey nii xñabey xley Moisés jkaa nii ksaan Dios, pa xkiñdy tsigo nii knildzy meñ xtiits Dios, ni lëe tiits kaa nii psaan Dios kyablyu. <sup>15</sup> Por xsaksi ley, per laañee kindy ley, kindyak cho ko falt.

<sup>16</sup> Lëe Dios beeñlay Abraham porñee bniladzy Abraham xtiits xaa, aan kchë meñ nii xniladzy xtiits Dios xkaa kyalnsaak ko singosy. Lëdy xaktyee par meñ nii chuuñtsyey nii xñabey xley Moisés nak kyalnsaak ko, sink wi par kchë meñ nii xniladzy xtiits Dios sinak bniladzy Abrahamo. Lëe Abraham nak pxosy kchësy meñ nii xniladzy xtiits Dios, <sup>17</sup> sinak nii xñee leñ kitsy nii kë xtiits Dios: “Lëen byuñ lii pxosy ndaly meñ nii nche tyub lo kislyu.” Dios nii chuuñ kpañ meñ kuty ni xko cos nii nody bniladzy Abraham.

<sup>18</sup> Nikxe kwyody pe nsaladzy Abraham, lëe xaa bniladzy xtiits Dios, aan singo mod lëe xaa byak pxosy ndaly meñ nii nche tyub lo kislyu. Por lëe Dios chëb lo xaa: “Lëe kchë meñ nii jkab lo xtiyyoo ktyaly.” <sup>19</sup> Pchosody styoo Abraham, nikxe nii tsel tu kyooow iz xaa, ni nikle nan xaa ni nii lëe xaa ni nii tsiil gaa xaa Sara chilody kap mëed. <sup>20</sup> Pkandy kik xaa ni psaanlasty xaa tiits nii psaan Dios lo xaa, sink tyub styoo xaa bniladzy xaaw ni ptee xaa skizh lo Dios. <sup>21</sup> Tyub styoo xaa bniladzy xaa nii chuñ Dios cumplir xtiits. <sup>22</sup> Por ngo nii lëe Dios beeñ cuent nii buen xaa.

<sup>23</sup> Lëdy por Abrahamsye xñee leñ kitsy nii kë xtiits Dios nii lëe Dios beeñ cuent nii buen xaa. <sup>24</sup> Wi por lëe now. Por lëe Dios chuñ cuent nii buen no kchë no siñee xniladzy no xtiits xaa nii beeñ kpañ Jesucrist. <sup>25</sup> Lëe Jesucrist kuty lo crusy por kchë xtol no, ni lëe xaa pañ parñee kteelaa xaa lëe no lo tol.

## 5

*Mbëe nche no lo Dios*

<sup>1</sup> Na nii lëe no kwtelaa lo tol porñee bniladzy no xtiits Dios, mbëe nche no lo Dios por Jesucrist. <sup>2</sup> Por Jesucrist kwaa no xkyaalnsaak Dios porñee bniladzy no xtiits xaa. Tsiitsy nche no lo xtiits xaa ni xle no nii lëe no jkaa xkyaalwnabey Dios. <sup>3</sup> Ni lëdy kaa por ngosy xle no, sink xle no lo kyalnë, por ndon no nii lëe kyalnë xnee kyalndaan lo no parñee kaap no paciensy. <sup>4</sup> Aan lëe paciensy chakni lëe no parñee buen kchukë no lo Dios, aan loxsye kchukë buen no, mastre kniladzy no xtiits Dios. <sup>5</sup> Aan kyaan maldy tiits ko lo no, por lëe Dios bnee xKyalbini Ntson lo no porñee xkëstyoo xaa lëe no.

<sup>6</sup> Por worñee karty kchilo telaa no, lëe Crist kuty por kchë meñ ngoptol worñee lëe tse kutsiñ. <sup>7</sup> Lëdy likasy kety meñ xcuent stu meñ, nikxe nii neñdy so tu xaa nii kety xcuent tu meñ buen. <sup>8</sup> Per nyoo nii xkëstyoo Dios no, por lëe Crist kuty por lëe no worñee bii ngoptol no. <sup>9</sup> Lëe nana nii lëe no kwtelaa lo tol por xkyalkuty Jesucrist, lëe no telaa lo kyalnë dox nii kiid. <sup>10</sup> Por deelñee big no lo Dios por xkyalkuty xiñ xaa worñee bii xtilyni no xaa, pe lëedyxe nina tsigo nii lëe xiñ xaa mbañ. <sup>11</sup> Ni xle gaa no lo Dios por Jesucrist, porque por Jesucrist big no lo xaa.

### *Adán ni Jesucrist*

<sup>12</sup> Por tugak xaa kwyo tol lo kislyu aan lëe tol biidni kyalkuty. Singo mod kchë meñ pchal kyalkuty, por kchë meñ kwloo tol. <sup>13</sup> Antes nii nyo ley, lëe tol tse no lo kislyu, nikxe nii chakty cuent nii no tol tsiñee kindy ley. <sup>14</sup> Per destye xtiemp Adán axte xtiemp Moisés lëe kyalkuty ptaan lo

xaa nii kwloo tol, nikxe nii beeñtsyeydy xaa si beeñtsyey Adán worñee psoobty Adán xtiits Dios. Lëe Adán kok sinak xaa nii tsigore biid.

<sup>15</sup> Per nakty tol nii beeñtsyey Adán sinak nii xneetsy Dios lo no. Por xtol tugak xaa ndaly meñ kuty. Per lëe kyalwtelaa nii xkady Dios, por tugak xaa biido, aan mastre ntsono, por ndaly meñ xtee-laaw. <sup>16</sup> Nakty xtol Adán sinak xkyalnsaak Dios. Por tugak tol biid castigw, per lëe xkyalnsaak Dios xtsily kchë kchësy xtol meñ. <sup>17</sup> Per deelñee xaktyee por xtol tu xaa ptaan tol, mastre no nii ktaan meñ nii ptsily Dios xtol singosy. Xtaan meñ go, por lëe meñ go mbañ sinak xñabey Jesucrist.

<sup>18</sup> Deelñee xaktyee por xtol Adán lëe xtol kchësy meñ kwyo, singo gak xaktyee por xkyalbuen Jesucrist pteelaa xaa kchësy meñ lo tol. <sup>19</sup> Porñee psoobty tugak xaa tiits, lëe xtol kchësy meñ kwyo, per singo gak porñee psoob tugak xaa tiits, lëe meñ telaa lo tol.

<sup>20</sup> Lëe ley biid parñee ktyaly tol, per tsiñee lëe tol lox ptyaly, mastre ptyaly xkyalnsaak Dios. <sup>21</sup> Lëe tol biidni kyalkuty. Lëe gaa xkyalnsaak Dios pteelaa lëe no lo tol ni bneetsy tu kyalmbañ nii tsitsiñdy tse nitylo lo no porñee bnildazy no xtiits Jesucrist.

## 6

### *Kuuty no lo tol, per mbañ no lo Dios*

<sup>1</sup> ¿Pe tyeesy no? ¿Pe slyore no tol nayak parñee kak nyoore xkyalnsaak Dios? <sup>2</sup> ¡Lëdyo gon! Lëe no kutyle lo tol. ¿Xa tsyore no lo tol na dyon? <sup>3</sup> ¿Pe nandy to nayak nii lëe no byak tusy ksa

no Crist por kyalwchobnis, ni lëe no byak ksa xaa lo xkyalkuty xaa? <sup>4</sup> Por kyalwchobnis lëe no pkyeetsy ksa no Jesucrist ni lëe no kuty parñee kpañ no ni jkaa no tu kyalmbañ kub, sinak nii pañ Jesucrist por xkyalwnabey Tat Tios.

<sup>5</sup> Por deelñee byak tusy no Crist worñee kuty xaa, lëe no kyak tusy xaa tsi lëe no kpañ si pañ xaa.

<sup>6</sup> Ndon no nii lëe kchë nii xsya styoo no kwë lo crusy ksa Crist parñee nitylow tsiin kñabeytre tol lo no. <sup>7</sup> Por chilody kñabey tol lo meñ nii chety.

<sup>8</sup> Deelñee ksa no Crist kuty, ndon no nii lëe no tsyo lo xaa. <sup>9</sup> Por ndon no nii lëe Crist pañ lo kyalkuty aan kpikchedre kety xaa. Pe kuñtre kyalkuty xaa.

<sup>10</sup> Tsiñee lëe Crist kuty, kaazhkaa kuty xaa lo tol, per lëe xaa pañ parñee tso xaa lo Dios. <sup>11</sup> Singo gak lëe do, kol kuñ cuent nii lëe do kuty lo tol, per mbañ do lo Dios, porñee nak ksa do Jesucrist.

<sup>12</sup> Por ngo, klaady to nii kñabey tol lo do, parñee kuuñtsyedy to nii klyaañtyee styoo do. <sup>13</sup> Kteejty to nii kyab to lo tol par kuuñtsyey do cos mal, sink kol tso ña Dios sinak meñ nii kuty ni bikche pañ stub. Kol tso ña Dios par kuuñtsyey do cos buen. <sup>14</sup> Por kñabeytre tol lëe do, por nodre to ña ley, sink lëe do no lo xkyalnsaak Dios.

### *Lëe do kwtelaa lo tol*

<sup>15</sup> ¿Pew tsigo? ¿Pe slyo no tol nayak por xñabeytre ley lëe no, sink lo xkyalnsaak Dios no no? ¡Lëdyo gon! <sup>16</sup> Nan nyë do nii deelñee to do lo tu xaa par ksoob to xtiits xaa, xpixwan do nak xaa aan no nii ksoob to xtiits xaa. Singo tsigo busy deelñee ksoob to xtiits tol, lëe do kety, o deelñee ksoob kaa to xtiits Dios, lëe do kyak tubli. <sup>17</sup> Per skizh Dios nii kchësy

to siñee kwyo do lo tol, lëe do psoob xtiits Dios tyub styoo do. <sup>18</sup> Lëe na nii lëe do kwtelaa lo tol, lëe do mbañ sinak xñabey Dios. <sup>19</sup> Xñen si xñee chol meñ, por chilody kyeñ do kchë cos re. Sinak nii ptee do tiits beeñtsyey do kchë cos mal, kol ktee nii kuuñtsyey do cos buen nii xyo styoo Dios.

<sup>20</sup> Worñee lëe do bii no lo tol, beeñtsyeydy to nii xñabey Dios. <sup>21</sup> ¿Per pe cos dyon beeñ do gan? Xaktyee xkwalto do xkwii kchë cos ko nina. Por xaktyee kyalkuty xneetsyo. <sup>22</sup> Per lëe na nii lëe do kwtelaa lo tol ni lëe do xkiiñ lo Dios, lëe do jkab lo Dios ni lëe do jkaa tu kyalmbañ nii xnitylody. <sup>23</sup> Kyalkuty sye xneetsy tol, per lëe xkyalnsaak Dios xneetsy kyalmbañ nii xnitylody, porñee byak ksa no Jesucrist.

## 7

### *Kyalwtsiilña*

<sup>1</sup> Beetsy, xyuumbey do ley ni nan do nii xaktyee tsiñee mbañ meñ xñabeyo meñ. <sup>2</sup> Sinak tu kwnaa nii xtsiilña, no nii tsoni me tsiil me mentre mbañ xaa, per deelñee kety tsiil me, lëe me xlyaa lo xley kyalwtsiilña. <sup>3</sup> Por ngo, deelñee tsoni me stu mguiy mentre bii mbañ tsiil me, tol chuñ me. Per deelñee kety tsiil me, schilo ktsiilña me stu mguiy aan chuñdy me tol, por nonidre me tsiil me.

<sup>4</sup> Singo gak lëe do, beetsy, nii ngab to lo Crist, lëe do kuty lo xley Moisés parñee ktsiilña do stu xaa. Lo Jesucrist nii pañ lo kyalkuty ngab to nina. Singo mod lëe no jkiiñ lo Dios. <sup>5</sup> Worñee pañ no sinak cho xaa ngoptol, lëe ley psoob ki kyalmal nii no leñ styoo no aan lëe kyalmal go beety lëe no.

<sup>6</sup> Per lëe na nii lëe no kuty lo ley nii pkëetuu lëe no, lëe no kwlaa parñee jkiin no lo Dios sinak xñabey Kyalbini Ntson, lëdy sinak xñabey ley.

*Tol nii no leñ styoon*

<sup>7</sup> ¿Pe styeesy no tsgigo nayak, nii tol xley Moisés? ¡Lëdyo gon! Per deelñee nyody ley, nyaknandyaa nii no tol. Nyaknandyaa nii ndox tsokin xcheñ meñ deelñee nyeedy ley: “Tso kidyoo xcheñ meñ.”

<sup>8</sup> Per lëe tol kwseñ ley parñee ksoobkiw kchë cos mal nii no leñ styoon. Por deelñee kindy ley, pa nondy tol. <sup>9</sup> Worñee byuumbeydyaa ley, pañaa. Per tsiñee lëen byuumbey ley, lëe tol nii no leñ styoon pkaa fuersy aan lëen kuty. <sup>10</sup> Singo lëe ley nii bneetsy kyalmbañ lon beety naa. <sup>11</sup> Por lëe tol kwseñ ley aan lëew pkëeti naa aan misme con ley beetyo naa.

<sup>12</sup> Ntson xley Moisés, ni buen nii xñabey ley.

<sup>13</sup> ¿Per pe buen ley tsgigo aan beetyo naa? ¡Lëdyo gon! Lëe tol beety naa aan singo kok nyoo nii tolo. Kwseñ tol cos buen par kuty, aan singo mod kok nyoo nii tir mal tol.

<sup>14</sup> Ndon no gon nii lëe Dios pxaal ley, per xaa lo kislyun aan lëe tol xñabey naa. <sup>15</sup> Xyeñdyaa penak xtsyolaa nrii. Por chuuñtsyeydyaa nii chakladzyaa, sink nii xyody styoon chuuñtsyeyaa. <sup>16</sup> Per deelñee chuuñtsyeyaa nii chaklastyaa kuuñtsyeyaa, xyeñaa nii buen ley. <sup>17</sup> Por ngo lëdre naa chuuñtsyey kchë cos ko, sink tol nii no leñ styoono. <sup>18</sup> Por nanaa nii xaa lo kislyun aan nody cos buen leñ styoon. Chakladzyaa kuuñtsyeyaa cos buen, per chilody kuuñtsyeyno. <sup>19</sup> Chuuñtsyeydyaa cos buen nii chakladzyaa, sink lëen chuuñtsyey cos mal nii

chaklastyaa. <sup>20</sup> Deelñee chuuñtsyeyaa nii chaklastyaa kuuñtsyeyaa, lédre naa chuuñtsyeyo, sink tol nii no leñ styoon chuuñtsyeyo.

<sup>21</sup> Singo tsiñee chakladzyaa kuuñtsyeyaa cos buen, klol cos mal xchoo leñ styoon. <sup>22</sup> Xyo xley Dios styoon, <sup>23</sup> per no tu cos leñ styoon nii xsyonlë lo xkyalcheñaa. Lëe tol nii no leñ styoono aan nguëtuuw naa.

<sup>24</sup> ¡Broobaa! ¿Cho kteelaa naa lo tol re? Por lëew chuty naa. <sup>25</sup> ¡Dios syew gon! Xtedyaa skizh lo Dios, por lëe Jesucrist pteelaa naa. Xyeñaa nii no nii kuuñtsyeyaa nii xñabey Dios, per como xaa lo kislyun, lëen këtuu lo tol.

## 8

### *Kyalmbañ nii xneetsy xkyalbini Dios*

<sup>1</sup> Kintre pe cos kyëkiy xaa nii nak ksa Crist. <sup>2</sup> Lëe kyalbini mbañ nii xnee Jesucrist pteelaa lëe no lo xley tol ni lo kyalkuty. <sup>3</sup> Por lëe Dios beeñtsyey nii pchilody xley Moisés. Lëe ley go byab lyu por xtol meñ. Lëe Dios pxaal xiñ sinak tu xaa nii no tol, aan biid xiñ xaa sinak chol meñ lo kislyu, parñee kuñ xaa gan lo tol. <sup>4</sup> Singo biid xaa parñee kchilo kuuñtsyey no nii xñabey ley, por mbañtre no sinak no chol xaa lo kislyu, sink lëe no mbañ sinak xñabey xKyalbini Dios.

<sup>5</sup> Kchë xaa nii mbañ sinak mbañ chol meñ, nii nosy lo kislyu sini kik xaa. Per lëe xaa nii mbañ sinak xñabey Kyalbini Ntson, ngosy sini kik xaa. <sup>6</sup> Aan kyalkuty xtsyool meñ nii sini kik cos nii chak lo kislyu re, per mbëe kpañ meñ nii chuuñtsyey nii xñabey xKyalbini Dios. <sup>7</sup> Kchësy meñ nii xaktyee

cos lo kislyu re sini kik xtilyni Dios, por chaklasty meñ go ni chilody meñ go ksal xley Dios. <sup>8</sup> Por ngo chuuñ ksakty meñ go Dios, por nii xlyaañtyee styoo meñ go chuuñtsyey meñ go.

<sup>9</sup> Per lëe do chuuñtsyeytre to nii chuuñtsyey kchë meñ nii no lo kislyu, sink sinak xñabey Kyalbini Ntson mbañ do, deelñee busy no Kyalbini Ntson leñ styoo do. Kchë meñ nii nody xkyalbini Crist leñ styoo, ngabty meñ go lo Crist. <sup>10</sup> Per deelñee no Crist leñ styoo do, mbañ xkyalbini do, por lëe Dios pteelaa lëe do, nikxe nii lëe xcuerp to kety por tol. <sup>11</sup> Aan deelñee no xkyalbini xaa nii beëñ kpañ Crist lo kyalkuty leñ styoo do, yuub xaa knee kyalmbañ lo do por Kyalbini Ntson nii no leñ styoo do.

<sup>12</sup> Singo tsiigo busy, beetsy, nsëeb no tu cos, per nsëebty now lo tol, parñee tso no si cho chol meñ lo kislyu. <sup>13</sup> Por deelñee kpañ do si klaañtyee styoo do, lëe do kety. Per deelñee kuñ Kyalbini Ntson lëe do yudar parñee ksaan do xtol do, lëe do kpañ.

<sup>14</sup> Kchësy meñ nii chuuñtsyey nii xñabey Kyalbini Ntson nak xiñ Dios. <sup>15</sup> Por lëdy kyalbini nii jkëetuu lëe do nak Kyalbini Ntson nii kwaa do, parñee ktsyeb to stub, sink lëe kyalbini go xyuñ lëe do xiñ Dios parñee këb to nii lëe Dios nak pxosy to. <sup>16</sup> Lëe Kyalbini Ntson xyak tusy xkyalbini no parñee tyeesy no nii xiñ Dios nak no. <sup>17</sup> Aan como xiñ Dios nak no, wi no jkaa nii ksaan Dios lo Crist. Deelñee xtyee no kyalnë ksa no xaa, lëe no kyo laañee xñabey xaa.

<sup>18</sup> Pa lëdy kyalnë nii xtyeedy no natiemp lo kyalnsaak nii nare tyon no. <sup>19</sup> Xekwtre kchë nii psaa Dios këmbëso tse nii lëe meñ nii nak xiñ

Dios kakyety. <sup>20</sup> Kchë nii psaa Dios byablyu, per lëdy porñee kokladzyo, sink styoo Dios kwlañ nii singo kak. Per kwyo tiits <sup>21</sup> nii nitylodyo, parñee jkaaw kyalntson nii jkaa meñ nii nak xiñ Dios. <sup>22</sup> Ndon no nii mban xtyedy kchë nii psaa Dios. Xkyëw yoob sinak xkyë tu kwnaa nii kap mëed yoob. <sup>23</sup> Ni lëdy kaa xaktyee kchë nii kwyaaxtye kyalnë, sink wi no, nikxe nii lëe no kwaan Kyalbini Ntson, parñee kak nyoo nii lëe no jkaa nii kneetsy Dios. Xkyëe no tu yoob në, këmbëes no tse nii lëe no kyak xiñ Dios, parñee jkub xcuerp no. <sup>24</sup> Por porñee pkyëmbëes no, lëe no kwtelaa. Per deelñee nyoo nii këmbëes no, pe nandyo, por lëew nyool. Deelñee xtyonle no tu cos, penak kyëmbëes now. <sup>25</sup> Per deelñee këmbëes no tu cos nii xtyondy no, no nii kaap no paciensy kyëmbëes now.

<sup>26</sup> Ni lëe gaa Kyalbini Ntson chuñ lëe no yudar lo xkylmban no. Por nandy no xa këee no lo Dios, per yuub Kyalbini Ntson xñab por lëe no lo Dios. Tsiitsyweew aan chilody këee no xa nak nii xñee con tiits. <sup>27</sup> Per como nan Dios pe xsya styoo no, nan xaa pe xñee Kyalbini, por lëe Kyalbini xñab nii xyo styoo Dios par meñ nii ngab lo Dios.

### *Beeñ no gan*

<sup>28</sup> Ndon no nii kchë cos no xfavor meñ nii xkëstyoo Dios. Kchë meñ go kwtsyetsy Dios porñee singo kwlaño styoo xaa. <sup>29</sup> Por kchë meñ nii klo byuumbey Dios, psaanle Dios nii lëe meñ go kak sinak xiñ xaa, parñee kak xiñ xaa xaa non lo kchë meñ nii ngab lo xaa. <sup>30</sup> Aan lëe Dios kwtsyetsy kchë meñ nii psaanle xaa destye klo, ni lëe xaa

ptsily xtol meñ nii kwtsyetsy xaa, ni kchë gaa meñ nii ptsily xaa xtol kwaa xkyaalnsaak xaa.

<sup>31</sup> ¿Pe tyeesy no tsigo? Deelñee no Dios xfavor no, ¿cho lë nii jkaal lëe no? <sup>32</sup> Per ni Xiñ Dios pkady Dios lo no, sink lëe xaa blaa kuty xiñ xaa por kchësy no. ¿Xa kneesty xaa kchë cos nii jkaa xiñ xaa wi lo no tsigo? <sup>33</sup> ¿Cho jkëëkiy kchë meñ nii kwle Dios na dyon?, con lëe Dios xñee nii nody xtol meñ go. <sup>34</sup> ¿Cho ktee kyo na dyon?, con lëe Jesucrist kuty ni lëe gaa xaa pañ, aan lëe xaa sob kwi Dios nëzli, xñab xaa por lëe no. <sup>35</sup> ¿Cho lë nii na dyon kuso lëe no lo xkyaalwkëstyoo Crist? ¿Pe skwiso kyalnë no, o nii kyënlaag kaa meñ no, o kpiñ gaa, o kyalproob kaa, o kyalntseeb kaa, o kyalkuty kaa?

<sup>36</sup> Leñ kitsy nii kë xtiits Dios gon xñee:  
Por lii ksatyee tse kënal kyalkuty noo.  
Xsyak meñ noo sinak mëkwxiiily nii kety.

<sup>37</sup> Per chuuñ no gan por xaa nii xkëstyoo lëe no. <sup>38</sup> Xyeñpaa nii per ni kyalkuty, ni kyalmbañ, ni angly, ni kyalbini mal, ni nii no natiemp, ni nii nare gaa kiid, <sup>39</sup> ni nii no kpa, ni nii no gaa leñ kislyu, ni tu cos nii no chilody kuso lëe no lo kyalwkëstyoo nii bneetsy Dios lo no por Jesucrist.

## 9

### *Meñ nii kwle Dios*

<sup>1</sup> Tiitsli xñen, por xniladzyaa xtiits Crist. Xkëëtiidyaa, por lëe Kyalbini Ntson xñee nii tiitsli xñen. <sup>2</sup> Xteenën ni tugak xkyë yoob styoon. <sup>3</sup> Axte xtegaanaa kyaabaa lo kyalsi, ni so sitaa lo Crist, deelñee nchilo nyuñaa meñ tu kyedzyaa yudar. <sup>4</sup> Meñ Israel nak meñ tu kyedzyaa, aan lëe Dios

been cuent nii xiñ Dios nak meñ go. Kwyo Dios lady meñ go ni psaan xaa xley Moisés lo meñ go, ni chëb xaa nii lëë xaa kteelaa meñ go, ni lëë xaa chëb xa kool meñ go lay. <sup>5</sup> Xaa xñabey nak pxusykoltoo meñ go ni lo xtiyy gaa meñ go pchoo Crist worñee koly xaa. Lëë Crist nak Dios. Kol tsoo ktee no skizh lo xaa tugak.

<sup>6</sup> Per lëdy nii kokty cumplir tiits nii psaan Dios lo meñ Israel, sink koktyo par meñ Israel nii ngabty lo Dios. <sup>7</sup> Lëdy kchë meñ nii sëed lo xtiyy Abraham nak xiñ Dios, por lëë Dios chëb lo xaa: “Lëë Isaac kuuñ ktyaly xiñoo.” <sup>8</sup> Nrii gon xluuy nii nakty meñ xiñ Dios por lo tiyy nii chaly meñ, sink xaktyee meñ nii koly sinak psaan Dios tiits nak xiñ Dios. <sup>9</sup> Por lëë Dios chëb lo Abraham: “Tsiñee lëë tiemp tsitsiñ, lëen kyely, aan lëë Sara kap tu mëed.”

<sup>10</sup> Ni lëdy sikosy byalo. Tugak pxosy chop xiñ Rebeca, Isaac pxusykoltoo no. <sup>11-13</sup> Por ni karty kaly mëed kwach ko, ni tu kyalbuen o kyalmaal gaa beeñtsyeydy xaa, lëë Dios chëb lo Rebeca: “Lëë mëed kol ksoob xtiits mëed wiich.” Ni leñ kitsy nii kë gaa xtiits Dios xñee: “Pkëstyoon Jacob, per blëen lo Esaú.” Nu nyoo nii lëë Dios xkwe meñ nii xlyañ styoo xaa, meñ nii chakladzy xaa xkwetsy xaa. Xkwenjty xaa nii chuuñtsyey meñ.

<sup>14</sup> ¿Pe styeesy no tsgo nii mal Dios? ¡Lëdyo gon!  
<sup>15</sup> Por lëë xaa chëb lo Moisés: “Skëstyoon xaa nii kakladzyaa.” <sup>16</sup> Singo tsgo busy, pe nandy nii kakladzy no o ktee gaa no fuersy, deelñee xkëstyoody Dios no. <sup>17</sup> Por leñ kitsyak nii kë xtiits Dios xñee nii chëb Dios lo rey Egipto: “Pson lii kakoo rey parñee kluyaa xkyalwnabeyaa, ni parñee kaknan

meñ cho nakaa lo kislyu.” <sup>18</sup> Skëstyoo Dios meñ nii kakladzy xaa, ni suuñ jkyedzy kaa xaa styoo meñ nii kakladzy xaa.

<sup>19</sup> Per neñdy snëel lon: “Deelñee singo mod nako, ¿pe jkëëkiy Dios meñ con ni tu cho chilody sonlë lo xaa?” <sup>20</sup> Per ¿chool na dyon parñee ktilytiitsnil Dios? ¿Pe xñee kis peñ lo xaa nii psaw nayak: “¿Penak nii psaal naa sinrii?” <sup>21</sup> Schilo xaa nii chuuñ tsiin peñ kuuñtsyey nii klyaañtyee styoo xaa. Schilo ksaaxaa tu kis peñ ngui, ni schilo ksaaxaa tu kis nii palsye jkiin.

<sup>22</sup> ¿Aan pe tyeesy no deelñee kokladzy Dios nluuy xcastigw ni xkyalwnabey, pxekw xaa lo meñ nii xyal tedy castigw ni xyal nitylo? <sup>23</sup> Lëew gon beeñtsyey xaa parñee kluuy xaa xkyalntson xaa lo no. Pkëstyoo xaa lëe no ni pxixkwaa xaa lëe no parñee tyon no xkyalntson xaa. <sup>24</sup> Por lëe Dios kwtsyetsy lëe no. No no nak meñ Israel. No gaa no nak meñ sit. <sup>25</sup> Leñ libre nii pkëe profet Oseas chëb Dios:

Meñ sit kak meñ tu kyedzyaa,  
ni meñ nii xkëstyodyaa jkëstyoon.

<sup>26</sup> Ni misme laañee chëb Dios:  
“Lëdy meñ tu kyedzyaa nak to”,  
siko lëe xaa këb:

Lëe do nak xiñ Dios mbañ.

<sup>27</sup> Per tsi lëe meñ Israel kokyety, lëe profet Isaías chëb: “Nikxe ndaly meñ Israel sinak ndaly yuzh nii nche chu nistoo, ndalydy meñ go telaa. <sup>28</sup> Por klyëedy lëe Dios kuñ cumplir xtiits tyub lo kislyu.”

<sup>29</sup> Misme profet Isaías chëb:

Deelñee ngwiladzy Dios meñ nii sëed lo xtiy no,  
lëe no nyak sinak meñ Sodoma ni Gomorra.

### *Bnilasty meñ Israel xtiits Dios*

<sup>30</sup> ¿Pe styeesy no tsigo? Kwëkyubty xaa sit nii mbig kex xaa lo Dios, sink lëe xaa big kex lo Dios porñee bniladzy xaa. <sup>31</sup> Per lëe meñ Israel nii kwyoxko beeñtsyey nii xñabey ley, beeñdy meñ go gan mbig kex lo Dios. <sup>32</sup> ¿Penak dyon beeñdy meñ go gan? Porñee gon big kexy meñ go lo Dios por kyalwniladzy, sink lëe meñ go big kex lo Dios por nii beeñtsyey meñ go. Por ngo lëe niy meñ go kwladzy kyo nii xlyadzy niy meñ. <sup>33</sup> Kyo re xseety kitsy nii kë xtiits Dios:  
Lëen kso tu xaa leñ kyedzy Jerusalén.  
Lëe xaa kchal niy meñ,  
per kchosody styoo meñ nii kniladzy xtiits xaa.

## 10

<sup>1</sup> Beetsy, tyub styoon xñabaa lo Dios nii telaa meñ Israel lo tol. <sup>2</sup> Nli xñen nii tir choxko meñ Israel jkiñ lo Dios, per nandy meñ Israel xa kuuñtsyey nii chakladzy Dios. <sup>3</sup> Por xyeñdy meñ Israel nii lëe Dios xtsily xtol meñ, sink xaa mod chakladzy meñ Israel telaa lo tol. Xsaldy meñ Israel nii psaan Dios. <sup>4</sup> Lëe Crist bisyaal xley Moisés tsiin kchë meñ nii kniladzy xtiits xaa telaa lo tol.

<sup>5</sup> Lëe Moisés xñee nii kchë meñ nii kuuñtsyey nii xñabey ley telaa lo tol. Per par ley sye kpañ meñ go. <sup>6</sup> Per lëe meñ nii telaa lo tol por kyalwniladzy, xñee kitsy nii kë xtiits Dios: “Këëbtyoo leñ styool: ¿Cho tsëp kpaa? (Nak nrii sinak nii nyëboo parñee kyety Crist.) <sup>7</sup> Ni këëbtyoo: ¿Cho kyety leñ kislyu?” (Por nak nrii sinak nii nyëboo parñee kchoo Crist lady meñ kuty.) <sup>8</sup> Xñee kitsy nii kë xtiits Dios: “Kexka lool so xtiits Dios, ni kexka chuwoo, ni

kexka styool.” Lëe tiits ko nak xtiits Crist nii xluuy noo. <sup>9</sup> Deelñee con chuwoo xñeel nii lëe Jesús xñabey lo no, ni tyub styool xniladzyoo nii beefñ kpañ Dios xaa lo kyalkuty, lëel telaa. <sup>10</sup> No nii kniladzy no leñ styoo no parñee kpily xtol no, ni no nii con chuw no kñee no cho nak Jesucrist parñee telaa no.

<sup>11</sup> Xñee kitsy nii kë xtiits Dios: “Ni tu meñ nii kniladzy xtiits Crist kchosody styoo.” <sup>12</sup> Nak xaady meñ Israel ni meñ sit. Por misme xDiosak meñ Israel nak xDios meñ sit, ni kchë gaa lo meñ xteedy xaa nii xñab meñ. <sup>13</sup> Por xñee kitsy nii kë xtiits Dios: “Kchësy meñ nii kseety lë Dios telaa lo tol.” <sup>14</sup> ¿Per xa kseety meñ lë Dios na dyon, deelñee karty kniladzy meñ xtiits Dios? ¿Ni xa kniladzy meñ Dios na dyon, deelñee karty jkëëtyag meñ xtiits Dios? ¿Ni xa jkëëtyag kaa meñ xtiits Dios na dyon, deelñee kindy cho kluuyo lo meñ? <sup>15</sup> ¿Ni xa tso xaa nii tsikluuy xtiits Dios na dyon, deelñee kindy cho kxaal xaa? Sinak xñee kitsy nii kë xtiits Dios: “¡Xaatke ntson chak tsiñee xlyañche xaa nii xluuy xtiits Dios!”

<sup>16</sup> Per lëdy kchë meñ xsal xtiits Dios. Sinak xñee profet Isaías: “Tat Tios, ¿cho xniladzy kaa xtiits no na dyon?” <sup>17</sup> Singo tsigo busy, lëe meñ xniladzy porñee xkëëtyag meñ xtiits Crist.

<sup>18</sup> Per xñee gakaa: ¿Pe pkëëtyag meñ xtiits Dios yak? ¡Pkëëtyag meño gon! Por xñee leñ kitsy nii kë xtiits Dios:

Tyub lo kislyu biñ meñ tsiy xaa nii bluuy xtiits Dios,  
ni tyubña lo kislyu ptsiño.

19 Per xñe gakaa stub: ¿Pe karty yak kyeñ meñ Israelo? Destye klo gon kwnee Moisés: Lëen kuñ nii ksiniy do tu kyedzy nii lëdy kyedzy, ni lëen kuñ nii klëe do lo tu kyedzy nii chaklasty kon tiits.

20 Lëe gak profet Isaías byax chëb: Meñ nii kwëkyubty naa ptsil naa, ni lëen bluylo lo meñ nii kwnabtiisty por naa.

21 Aan tsi lëe profet Isaías xseety meñ Israel, xñee xaa: “Tyub tse kwtsyetsyaa meñ ntseeb nii xsoobty tiits.”

## 11

### *Meñ Israel nii kwle Dios*

1 Lëe nana xñen: ¿Pe psaan Dios meñ Israel tublad yak? ¿Lëdyo gon! Misme naa, xaa Israelaa. Abraham nak pxusykoltoon. Lo xtiy Benjamín syelyaa. 2 Destye klo kwle Dios meñ Israel parñee jkab meñ Israel xkyedzy Dios. Lëe na xsaandy Dios meñ Israel tublad. ¿Pe nandy kaa to nayak nii leñ kitsy nii kë xtiits Dios xñee nii tsiñee biily profet Elías lay, pkëëkiy xaa meñ Israel lo Dios? Chëb xaa: 3 “Tat Tios, lëe meñ beety xiprofeto ni lëe meñ bnitylo xipkoogoo. Xaktyee naa mbañ aan win chakladzy meñ kety.” 4 Per lëe Dios kwëb: “Lëen kwle kadzy mily xaa nii karty ksoxib lo mdyo nii lë Baal parñee jkiñ xaa lon.” 5 Singo gak natiemp bii no chop tson xaa nii kwle Dios por xkyalnsaak Dios. 6 Aan por xkyalnsaak Dioso, lëdy por kyalbuen nii chuuñtsyey meño. Por deelñee nyako por nii chuuñtsyey meñ, lëdre por xkyalnsaak Dioso.

7 Kwaady xaa Israel nii kwëkyub xaa, per lëe xaa nii kwle Dios sye kwaaw. Lëe los demasy meñ

pkyedzy styoo, <sup>8</sup> sinak xñee kitsy nii kē xtiits Dios: “Lëë Dios beeñ jkyedzy styoo xaa go, aan axte natse singo nak xaa. Sob mëlo xaa, per xñady lo xaa, ni sob tyag xaa, per chondy xaa.” <sup>9</sup> Wi gak rey David chëb:

Deelba kyak xilni xaa tramp ni kyako kyex, parñee ladzy niy xaa tsiin te xaa castigw.

<sup>10</sup> Deelba jkyey lo xaa parñee kandy xaa, ni deelba kyeech xitsy xaa kaazhkaa.

### *Meñ sit nii xtyelaa*

<sup>11</sup> Lëë nana xñee gaakaa: ¿Pe kaazhkaa nayak byab meñ Israel lyu? ¿Lëdyo gon!, sink worñee nii lëë meñ Israel pchooxso lo Dios, lëë meñ sit pchilo kwtelaa parñee tsoki styoo meñ Israel. <sup>12</sup> Deelñee por xtol meñ Israel lëë meñ sit kwaa xkyalnsaak Dios, ¿pe toodyxe tso kyalwle tsiñee lëë meñ Israel ktikche styoo lo Dios?

<sup>13</sup> Per lëën kniy tu cos lo do nii nak to meñ sit. Lëë Dios pxaal naa lo meñ sit. Por ngo ngui chuuñtsyeyaa xtsiñaa. <sup>14</sup> Por chakladzyaa nii tsoki styoo meñ tu kyedzyaa kan lëë do parñee ktee xaa nii telaa xaa lo tol. <sup>15</sup> Por deelñee byaan meñ Israel tublad parñee kpig meñ sit lo Dios, ¿pe lë nii kak tsiigo tsiñee lëë meñ Israel kpig lo Dios stub? Lëë meñ Israel gon jkaa kyalmbañ. <sup>16</sup> Por deelñee nak lay kyaxtily, tyub kobyi nak lay, aan deelñee nak lay lu tu yag, wi xikwo nak lay lo Dios.

<sup>17</sup> Nak meñ Israel sinak xikw yag oliv nii kwchug, aan xlugaro kwsëeb to nii nak to sinak tu yag oliv tañ. Singo mod lëë do pkab lo lu yag ko.

<sup>18</sup> Per ktaandy to lo xikw kol yag ko. Deelñee xtaan

do, kol ksaladzy nii lëdy lu yag ko nak to, sink lu yag ko nseñ lëe do.

<sup>19</sup> Neñdy snë do: “Per lëe xikw yag ko kwchug parñee kyënaady no chex yag ko.” <sup>20</sup> Nliw, per lëe meñ Israel kwchug porñee bnilasty meñ Israel xtiits Dios, aan lëe do sob chex yag ko porñee bniladzy to. Ktaandy to, sink masy kol ktsyeb. <sup>21</sup> Por deelñee beeñdy Dios perdón xaa nii penaadle kok xikw yag, ni lëe do kuñdy xaa perdón. <sup>22</sup> Kol kuy gaanoo xaatke buen Dios, nixxe nii ntseeb xaa. Ntseeb xaa lo meñ Israel nii pchooxso, per buen xaa lo do. Per no nii kpañ do sinak xñabey xaa, por deelñee kpañdy to singo, lëe do chug. <sup>23</sup> Deelñee kniladzy xaa Israel xtiits Dios, lëe xaa kpig lo Dios stub, por schilo ktsig kex Dios xaa stub. <sup>24</sup> Deelñee lëdy xaa Israel do, tu xikw yag oliv tañ do, aan lëe do kwënaady chex yag buen. ¿Pe lëedyxe xaa Israel tsgo nii destye chex yag buen kwsob xaa, lëe xaa gon kyënaady chex xyag xaa stub?

### *Lëe meñ Israel telaa*

<sup>25</sup> Lëen kniy nii ngolan Dios, parñee sakty to nii xaa chak to. Lëe styoo meñ Israel pkyedzy parñee kpig kex meñ sit lo Dios. <sup>26</sup> Aan tsiñee lëe ngo kyal, kchë meñ Israel telaa lo tol, por xñee xkitsy Dios: Lëe xaa nii kteelaa kiid Jerusalén, aan lëe xaa kwii xtiiy Jacob lo tol.

<sup>27</sup> Aan tiits re xsanaa, nii lëen ktsily kchë xtol meñ Israel.

<sup>28</sup> Nak xaa Israel sinak meñ nii xlëe lo xtiits Dios, parñee knee Dios tiits telaa do. Per bii xkëstyoo Dios xaa Israel, por lëe Dios kwle pxusykooltoo xaa.

<sup>29</sup> Por xlady Dios nii xneetsy xaa, ni xtsëedy Dios

lo xtiits. <sup>30</sup> Tiemp psoobty to xtiits Dios, per lëe na nii xsoobty meñ Israel tiits, lëe Dios xkëstyoo lëe do. <sup>31</sup> Xsoobty xaa Israel tiits nina, parñee jkëstyoo Dios lëe do ni parñee jkëstyoo Dios xaa nina. <sup>32</sup> Lëe Dios blaa nii kchësy no ksoobty tiits, parñee jkëstyoo xaa lëe no, kchësy no.

<sup>33</sup> ¡Natsypee ngol xkyaalsaak Dios, ni xkyaal-nyaani xaa, ni xkyaalchak xaa! Ni tu cho chilody kyeñ nii no kik xaa ni kchë nii chuuñtsyey xaa. <sup>34</sup> Por ¿cho nan na dyon pe cos no kik Dios? ¿Ni cholë nii gaa kteedy consef lo xaa? <sup>35</sup> ¿Pe no gaa cho pteedy pe tu cos lo xaa parñee ktikche xaaw? <sup>36</sup> Por kchë cos sëed lo Dios. Por lëe xaa ni par lëe gaa xaa no kchësy cos. ¡Tugak kol tsoo ktee no skizh lo Dios! Amén.

## 12

### *Nii no kuuñtsyey meñ nii xniladzy xtiits Dios*

<sup>1</sup> Xñabaa lo do, beetsy, nii por xkyaalsaak Dios kokon do xcuerp to lo xaa. Por xyo styoo Dios nii kteedy to skizh lo xaa singo mod. <sup>2</sup> Kpañdy to si mbañ meñ natiemp, sink kol ktsëe xmod to parñee ngui kpañ do ni kyeñ do nii chakladzy Dios, tsiin kyeñ do pe cos buen, ni pe cos mbëe, ni pe cos tubli.

<sup>3</sup> Por kyaalsaak nii bneetsy Dios lon, lëen xñe kchë lo do nii saky to nii tir non do, sink ngui kol ko kik to aan ndoladzy kol kak, según kyaalsaak nii bneetsy Dios lo do porñee xniladzy to xtiits xaa.

<sup>4</sup> Ndaly nii sob lady no, per xaal xaal laa xkiiño.

<sup>5</sup> Singo gak lëe no, nikxe ndaly no, lo Crist ngab no kchësy no. Tusyke nak no ksa no xaa, sinak nii nyak no tugak cuerp.

<sup>6</sup> Xaal xaal nak kyalnsaak nii bneetsy Dios lo no, según kwlaño styoo xaa. Por ngo, deelñee kwaa no kyalnsaak nii kñee no xtiits Dios, no nii kñee now tyub styoo no. <sup>7</sup> Deelñee kwaa gaa no kyalnsaak nii jkiiñ no lo meñ, no nii jkiiñ no ngui mod. Xaa nii kwaa kyalnsaak nii kluuy xtiits Dios, no nii kluuy xaaw lo meñ. <sup>8</sup> Lëe xaa nii gaa kwaa kyalnsaak nii kchooblady styoo meñ, no nii kchooblady xaa styoo meñ. Lëe xaa nii gaa xkady, no nii ngui mod jkady xaa. Singo gak xaa nii kwaa tu tsiin, no nii kuuñsyey ngui xaaw. Singo gak xaa nii chuñ yudar, no nii nguiool tso styoo xaa tsiñee chuñ xaa yudar.

<sup>9</sup> Kol jkëstyoo lsa lëe do tyub styoo do. Kol kpixlady kan do cos mal aan kol kuuñsyey cos buen. <sup>10</sup> Kol jkëstyoo xcombañer do sinak nii nyak xaa betsy to. Kol ktee xlugar xaa ni kol ksal xaa.

<sup>11</sup> Kol kyë tsiin, ktsyaabty to. Kol jkiiñ lo Dios tyub styoo do.

<sup>12</sup> Nguiool kol kpañ por kchë nii xnilady to. Kol kxekw kyalnë. Ksaandy to tugak kol kool lay lo Dios.

<sup>13</sup> Kol sak nii xlyaadzy to nak xlyaadzy meñ nii xnilady xtiits Dios. Ngui kol kan meñ nii chiid tedy lo do.

<sup>14</sup> Kol nab lo Dios nii kuuñlay xaa xaa nii xkyënlaag lëe do. Ktsiibtedy to xaa.

<sup>15</sup> Kol kle ksa do xaa nii xle, ni kol koon ksa do xaa nii choon.

<sup>16</sup> Ngui kol kpañ kchë xcombañer do. Kak nyaady to, sink kol kak ndolady. Sakty to nii tir chak to.

<sup>17</sup> Ktikchedy to mal por mal. Kol ktee nii tugak kuuñtsyey do cos nii buen lo kchë meñ. <sup>18</sup> Axte laañee kteedyo tiits, ngui kol kpañ kchë xcombañer do. <sup>19</sup> Beetsy, kuñdy to kyalxtisy yuub to, sink kol klaa nii lëë Dios ksaksi, sinak nii xñee xtiits xaa: “Naa kuñ kyalxtisy ni naa kizh meñ.” <sup>20</sup> Ni xñeew: “Deelñee xlyaañ xaa nii xlëë lool, ptee nii kaw xaa. Ni deelñee xlyaa xaa nis, ptee nii ki xaa, tsiin kyan lo xaa lo kyalto.” <sup>21</sup> Klaady to nii kuñ kyalmal gan lo do, sink kol kuñ gan lo kyalmal con kyalbuen.

## 13

<sup>1</sup> No nii kchë do ksoob xtiits xaa xñabey. Por nody ni tu xaa xñabey nii psoobty Dios, aan kchë xaa xñabey nii no, Dios pso xaa. <sup>2</sup> Por ngo kchë xaa nii xsoobty xtiits xaa xñabey, xtiits Dios xsoobty xaa. Aan lëë kchë xaa go tedy castigw. <sup>3</sup> Por nody xaa xñabey parñee ktseb xaa xaa nii chuñ kyalbuen, sink lëë xaa no par xaa nii chuñ kyalmal. Deelñee chaklastyoo ktsyeeboo xaa xñabey, ngui kok tsiin kakni xaa xñabey lii. <sup>4</sup> Por Dios kë xaa xñabey tsiin parñee kuñ xaa lii yudar. Per deelñee chuñoo kyalmal, ptsyeb. Por lëdy lika noy xaa spad, por xtsiin Dios kë xaa par ksaksi xaa xaa nii chuñ kyalmal. <sup>5</sup> Por ngo no nii ksoob no xtiits xaa xñabey, lëjty xaktyee parñee ksaksidy xaa lëë no, sink porñee no xkyalcheñ no. <sup>6</sup> Wi por ngo xkizh to contribucion, por xtsiin Dios kë xaa xñabey aan ngo nak xtsiin xaa.

<sup>7</sup> Kol ktee nii chigal catu xaa. Kol kizh kchë contribucion lo xaa nii xtopo. Deel no gaa xaa nii

ksal do, kol ksal xaa, ni deel no gaa xaa nii xyal ksoob to xtiits, kol ksoob xtiits xaa.

<sup>8</sup> Ni tu cho lo kyëtiñdy to, sink kol jkëstyoo lsa xcombañer do. Por deelñee jkëstyoo do, lëe do beeñle cumplir nii xñabey ley. <sup>9</sup> Lëe ley gon xñee: “Tsonidyoo stu meñ deelñee no tsiiloo, kujtyoo, kwandyoo, tsookidyoo.” Per schilo kak cumplir kchë ngo con ley nii xñee: “Pkëstyoo xcombañeeroo sinak xkëstyool lii.” <sup>10</sup> Xsaksidy xaa nii xkëstyoo xcombañer. Singo mod lëe kyalwkëstyoo chuuñtsyey nii xñabey ley.

<sup>11</sup> Kol kyeñ xa nak tiemp nii no no, ni kol kaknan nii lëe wor kutsiñ nii kte xkaal no. Por xtsedre lëe no telaa. Naktyo sinak worñee kal bniladzy no xtiits Dios. <sup>12</sup> Lëe kyool mer tedy aan lëe yutsye sëed. Por ngo kol tsoo ksaan no cos nii chak lo nguey, aan kol tsoo kwe no lo bini sinak tsiñee xkwetsey soldad. <sup>13</sup> Nguì kol tso tsoy no sinak cho meñ yutsye. Kyëedy no kunip ni kuuñdy no lni yox, ni tsonidy no stu mguiy o stu gaa kwnaa, ni ktildy no ni kak mbijty no. <sup>14</sup> Sink kol sak Jesucrist sinak tu ladx kiib nii kakw to, aan kuuñtsyeydy to cos mal nii no styoo do.

## 14

### *Kñeenëdy to*

<sup>1</sup> Nguì kol nee lo xaa mban nii xyuumbey nizhty xtiits Dios. Ktilytiitsnidy to xaa. <sup>2</sup> No xaa nii chaw kchëlo cos. No gaa xaa mban nii kizh yësy chaw. <sup>3</sup> Per nody nii ksee xaa nii chaw kchëlo cos xaa nii chawdy cualquier cos. Singo gak xaa nii chawdy kchëlo cos nody nii ksee xaa nii chaw kchëlo cos,

por lëe Dios pkaaña xaa tub tub xaa. <sup>4</sup> ¿Cho nakoo parñee kñeenël xmos stu xaa? Deelñee buen so xaa o maal gaaw, lëe xpatrón xaa kan. Per buen kyaan xaa lo xpatrón xaa, por lëe Dios ksoli xaa.

<sup>5</sup> No xaa nii xsyak nii no tse nda, ni no xaa nii xsyak nii tublosy nak tse. Catu xaa no nii kniladzy xaa nii no styoo xaa. <sup>6</sup> Kchë xaa nii xsyak nii nda nak tu tse, par Dios xsyak xaa ndaw. Lëe xaa nii gaa chaw kchëlo cos, par Dios chaw xaaw aan xtee xaa skizh lo Dios. Singo gak xaa nii chawdy kchëlo cos, par kuuñ ksak xaa Dios chawdy xaa kchëlo cos ni xtee gaa xaa skizh lo Dios.

<sup>7</sup> Ni tu no mbañdy porñee chakladzy no, ni ni tu no chejty porñee xlyaño styoo no. <sup>8</sup> Deelñee mbañ no, par Dios mbañ no. Deelñee kety kaa no, par Dios kety no. Por ngo nikxe kpañ no, nikxe gaa kety no, lo Dios ngab no. <sup>9</sup> Por lëe Crist kuty ni lëe xaa pañ parñee kñabey xaa lo meñ kuty ni lo meñ mbañ.

<sup>10</sup> ¿Penak tsigo xñeenël betsyoo? ¿O penak kaa xpixladzyoo chanoo xaa? Kchë no kyo lo Dios parñee kuñ xaa xkyalxtisy no. <sup>11</sup> Por leñ kitsy nii kē xtiits Dios xñee:

Nli xñen, chëb Tat Tios,  
nii kchësy meñ ksoxib lon,  
ni kchë meñ knee skizh lon.

<sup>12</sup> Singo tsigo busy kchë no kak tsyetsy lo Dios parñee ktee no cuent lo xaa.

### *Kuñdy to xtol xcombañer do*

<sup>13</sup> Por ngo nody nii kñeenë no xcombañer no. Kol ktee nii kchondy to xcombañer do lo tol tsiin kusody to xaa lo xtiits Dios. <sup>14</sup> Nanaa nii ni tu cos nii xtyaaw peejty. Xñen nrii porñee xniladzyaa xtiits

Crist. Per deelñee no tu xaa nii xsyak nii peedy tu cos, peedyo lo xaa. <sup>15</sup> Deelñee porñee chaawoo xkëëtaño xcombañeroo, lëdre por kyalwkëstyoo chuuñtsyeyoo cos. Klaadyoo nii kyëtañ tu xaa nii xniladzy xtiits Dios por cos nii chaawoo, por wi por lëe xaa kuty Crist. <sup>16</sup> Kteejty to tiits nii kñeenë meñ kyalnsaak nii kwaa do. <sup>17</sup> Por nody Dios lady no porñee xtyaaw no o xtyow gaa no pe cos, sink lëe xaa no lady no porñee mbañ no sinak xñabey xaa ni porñee xle no por Kyalbini Ntson nii no leñ styoo no. <sup>18</sup> Kchë xaa nii xkiiñ lo Crist singo mod, chuuñ ksak xaa Dios ni buen xchukë xcuent xaa lo meñ.

<sup>19</sup> Por ngo, kol tsoo kuuñtsyey no kchë cos nii kchooblady styoo xcombañer no, ni kol tsoo kuuñ no xaa yudar. <sup>20</sup> Jkëtañdy to lo xtsiiñ Dios por nii xtyaaw. Kchë nii xtyaaw nyë, per ntseeb ktyaaw tu cos deelñee xkëëtaño meñ. <sup>21</sup> Masy silidyee tyaawdy no pëel ni tyowdy no viñ ni kuuñtsyeydy no cos nii kuso xcombañer no lo xtiits Dios. <sup>22</sup> Deelñee xniladzyoo xtiits Dios, liisy ni Dios sye nano. ¡Dichos xaa nii pe sinidy kik por chuuñtsyey xaa nii xyo styoo Dios! <sup>23</sup> Per lëe xaa nii nolidy kik tsiñee chaw xaa pe tu cos, chak xtol xaa, porñee chawdy xaaw tyub styoo xaa. Aan kchë xaa nii no tublidy styoo tsiñee chuuñtsyey xaa tu cos, tol chuñ xaa.

## 15

### *Beeñ ksak xcombañeroo, kuuñ ksaktyoo lii*

<sup>1</sup> Kchë no siñee tsiitsy nche no lo xtiits Dios, no nii syak no xlyaadzy xaa mban sinak nii nyako xlyaadzy no aan kuuñ ksakty no lëe no. <sup>2</sup> No nii

kchë no kuuñtsyeey cos buen parñee kuuñ ksak no xcombañer no tsiin kniladzyre xaa xtiits Dios. <sup>3</sup> Por ni Crist beeñ ksakty xaa lëë xaa, sink lëë xaa beeñ cumplir xtiits Dios nii xñee: “Naa pchal kchë nii kwlootsyetsy meñ lii.” <sup>4</sup> Kchë nii kwnee Dios tiemp kwë parñee jkiiño lo no tsiin kchosody no ni kchoobladyo styoo no parñee kniladzyre now. <sup>5</sup> Aan lëë lëësy Dios nii xnee kyalndoladzy dyon kakni lëë do parñee ngui kpañ do kchë xcombañer do sinak nii bluuy Crist <sup>6</sup> parñee tugak kak tsiy do tsiñee ktee do skizh lo Tat Tios pxosy Jesucrist.

*Lëë meñ sit xkëëtyag xtiits Dios*

<sup>7</sup> Kol jkaaña xcombañer do sinak nii pkaaña Crist to parñee kteedy meñ skizh lo Dios. <sup>8</sup> Chakladzyaa kniyaa lo do nii lëë Crist biid parñee jkiiñ xaa lo meñ Israel. Lëë xaa biid kuñ cumplir nii chëb Dios lo pxusykoltoo meñ Israel parñee kluuy xaa nii chuñ Dios cumplir kchë nii xñee Dios. <sup>9</sup> Ni lëë xaa biid parñee wí meñ sit ktee skizh lo Dios por xkyaalnsaak Dios, sinak nii xñee kitsy nii kë xtiits xaa:

Por ngo lëën kñe cho nakoo lo meñ sit,  
ni lëën kol lay lool.

<sup>10</sup> Lëë stub lugar xñee xkitsy Dios:  
Kchë do siñee nak to meñ sit, kol kle ksa do meñ  
xkyedzy Dios.

<sup>11</sup> Lëë gak kitsy nii kë xtiits Dios xñee:  
Kchësy to siñee nche do lo kislyu,  
kol ktee skizh lo Tat Tios.

<sup>12</sup> Lëë stub lugar pkëë profet Isaías:  
Lëë xtiyy Isaí jkëpeñ,  
aan lëë xaa kchoo kñabey xaa lo meñ sit,  
aan lëësy xaa ksaladzy meñ sit.

<sup>13</sup> Lëe lëesy Dios nii xnee kyalndoladzy dyon, ko nguiool styoo do ni knee tiits nii mbëë kpañ do kchë do siñee xniladzy to xtiits xaa, parñee mastre tso kyalwniladzy leñ styoo do por xkyalwnabey Kyalbini Ntson.

<sup>14</sup> Beetsy, nanpaa nii no kyalndoladzy leñ styoo do, ni nanaa nii chak to, ni nanaa nii schilo kuuñ kseedy to xcombañer do, <sup>15</sup> per lëen byax pkën chop tson cos leñ kitsy re, parñee knitylasty tow. Lëe Dios kwnabey naa. <sup>16</sup> Kyën xtsiiñ Jesucrist lo meñ sit. Xluyaa xtiits Dios nii xteelaa lo meñ sit, parñee kpig meñ sit lo xaa, ni kak meñ sit sinak tu cos nii xlyaa nex nii chokon lo Dios. Por lëe Kyalbini Ntson chuuñ nyë meñ sit.

<sup>17</sup> Porñee xniladzyaa xtiits Jesucrist, ngo nii xlen kën xtsiiñ Dios. <sup>18</sup> Kyaxtyaa kñën stu cos, sink lëen kñe nii chuuñtsyey Crist por naa, parñee ksoob meñ sit xtiits Dios. Pkëëtyag meñ sit xtitsaa <sup>19</sup> ni kon meñ sit kyalntson ni milagre nii beeñtsyeyaa por Kyalbini Ntson. Singo mod lëen beñ cumplir bluyaa xtiits Crist nii xteelaa. Destye Jerusalén bislon aan ptsiiñaa axte xtañ meñ Iliria. <sup>20</sup> Singo mod lëen bluy xtiits Dios nii xñee cho nak Jesucrist laañee karty kon meño, parñee kyëdyaa tsiñ laañee bislol stu meñ. <sup>21</sup> Lëen beñ nii xñee kitsy nii kë xtiits Dios:

Lëe meñ nii destye karty kon cho nak xaa kan xaa, ni lëe meñ nii karty jkëëtyag xtiits xaa kyeñ.

### *Lëe Pable xkokyeñ tsi Roma*

<sup>22</sup> Por ngo karty ktee tiits kyely teedyaa lo do, nikxe ndaly vuelk wlokyyeeñaa nyelyaa. <sup>23</sup> Per lëe na nii lëen byal xtsiñaa tañ re, ni como kokle gaa

ndaly iz nii chakladzyaa kyelyaa lo do, <sup>24</sup> tsaap steedyo tiits tsiñee lëen ka España. Aan loxsye kanaa lëe do, tsaap schilo kuñ do naa yudar kt-siiñaa laañee san. <sup>25</sup> Per lëe na lëen ka Jerusalén par kanin tu nii jkiiñ lo betsy no nii no siko. <sup>26</sup> Por lëe styoo meñ Macedonia ni meñ Acaya kwlañ nii ktop xaa tumi aan kxaal xaaw lo betsy no nii no lyaadzy Jerusalén. <sup>27</sup> Styoo xaa kwlaño ni bueen gaa beeñtsyey xaa, porque por meñ Israel bniladzy xaa xtiits Dios. Por ngo no nii kuñ xaa meñ Israel yudar. <sup>28</sup> Tsiñee lëen lox kte nii ptyop, lëen kcho par España aan lëen kyely teedy lo do. <sup>29</sup> Xyeñpaa nii tir kuuñlay Crist lëe do tsiñee lëen kyely teedy lo do.

<sup>30</sup> Beetsy, por Jesucrist ni por kyalwkëstyoo nii xneetsy Kyalbiní Ntson lo no, xñabaa nii kyak tusy no, parñee kñab no lo Dios por naa. <sup>31</sup> Kol nab lo Dios nii kteelaa xaa naa lo meñ Judea nii xni-lasty xtiits Crist, ni kol nab nii mbëe jkaaña meñ Jerusalén nii sanin, <sup>32</sup> parñee tsaap në Dios que nii nguiool no styoon tsiñee klyaaña lo do aan kxiladzyaa lo do. <sup>33</sup> Lëe lëesy Dios nii xchooblady styoo meñ dyon kakni lëe do. Amén.

## 16

### *Lëe Pable xkëëptyux meñ*

<sup>1</sup> Xkëëbaa psyañ no Febe lo do. Leñ kyedzy Cencrea kë me xtsiiñ Dios. <sup>2</sup> Kol kan me sinak xtyoon meñ nii ngab lo Crist, por singo no nii kuuñtsyey meñ nii xniladzy xtiits Crist. Kol ktee kchë nii jkiiñ lo me, por tir chuñ me meñ yudar ni wi gaan beeñ me yudar.

<sup>3</sup> Kol jkëëptyux Prisca ni Aquila. Ksan me kë xtsiiñ Crist. <sup>4</sup> Kwyo me xnëz kyalkuty par ktee-laa me naa. Lëdy nonsyaa xte skizh lo me, sink wi kchë meñ sit nii xniladzy xtiits Dios. <sup>5</sup> Kol jkëëptyux kchë meñ nii xkaal lsa lidzy Prisca ni Aquila. Kol jkëëptyux xamigwaa Epeneto. Klootyee xaa bniladzy xtiits Crist nëz Asia. <sup>6</sup> Kol jkëëptyux Mariy nii tir xkyë tsiin lady to. <sup>7</sup> Kol jkëëptyux xaa tu kyedzyaa Andrónico ni Junias. Ksan xaa kwyo skiib. Apostle nii nli chuñ tsiin nak xaa. Klo xaa bniladzy xtiits Crist lon.

<sup>8</sup> Kol jkëëptyux Ampliato. Xamigwaa nii xniladzy xtiits Crist nak xaa. <sup>9</sup> Kol jkëëptyux Urbano. Ksa noo xaa xkyëë tsiin. Ni kol jkëëptyux Estaquis. <sup>10</sup> Kol jkëëptyux Apeles. Tugak xluuy xaa nii nli xniladzy xaa xtiits Crist. Ni kol jkëëptyux meñ lidzy Aristóbulo. <sup>11</sup> Kol jkëëptyux xaa tu kyedzyaa Herodión, ni kol jkëëptyux meñ lidzy Narciso nii xniladzy xtiits Dios. <sup>12</sup> Kol jkëëptyux Trifena ni Trifosa. Wi me xkyë xtsiin Crist. Ni kol jkëëptyux psyañ no Pérsida. Tir xkyë me xtsiin Dios. <sup>13</sup> Kol jkëëptyux Rufo. Ngab xaa lo Dios. Ni kol jkëëptyux xña xaa. Nak me sinak tnan. <sup>14</sup> Kol jkëëptyux Asíncrito, ni Flegonte, ni Hermes, ni Patrobas, ni Hermas ni betsy no nii nche lo xaa. <sup>15</sup> Kol jkëëptyux Filólogo, ni Julia, ni Nereo ni psyañ xaa, ni Olimpas ni kchë meñ nii xniladzy xtiits Dios nii nche lo xaa.

<sup>16</sup> Kol jkëëptyux lsa xcombañer do aan kol kaw tu pxit kwesy xaa. Kchë meñ nii xniladzy xtiits Dios xkëëptyux lëë do.

<sup>17</sup> Beetsy, xñabaa nii kan do cho chuñ lëë do chop tiy ni cho xlyë lo xtiits Dios nii pkëëtyag to. <sup>18</sup> Kol

ksosit lo xaa go, por xkyëdy xaa xtsiiñ Jesucrist, sink lyaadzy nii kuuñtsyey xaa nii xlyañ styoo xaa no xaa, aan con tiits ngui xkëëti xaa meñ mban. <sup>19</sup> Kchësy meñ nan nii nsoob tiits to. Por ngo xlen. Aan chakladzyaa nii kak nyaani do par kuuñtsyey do cos buen, lëjty nii kuuñtsyey do cos mal. <sup>20</sup> Aan klyëëdy lëë Dios knee tiits nii sobniy do xaatox. Lëë lëësy Jesucrist dyon kakni lëë do.

<sup>21</sup> Xkëëptyux Timoteo lëë do. Chopaa xaa xkyë tsiñ. Ni xkëëptyux xaa tu kyedzyaa Lucio ni Jasón ni Sosípater lëë do.

<sup>22</sup> Naa nak Tercio. Naa xkë kitsy re. Xkëëptyuuxaa lëë do. Win ngab lo Crist.

<sup>23-24</sup> Xkëëptyux Gayo lëë do. Lidzy xaa xkwësaa. Kchë lo meñ nii xniladzy xtiits Dios xtee xaa lidzy xaa. Ni xkëëptyux Erasto nii nak tesorer lëë do, ni xkëëptyux betsy no nii lë Cuarto lëë do.

<sup>25</sup> Kol tsoo ktee no skizh lo Dios. Lëë xaa kso tsiitsy lëë do lo xtiits Crist nii bluyaa lo do. Tiits ko kwlootsey Dios destye worñee karty kwe kislyu, <sup>26</sup> per lëë na lëëw kok ndoon por kchë nii pkëë profet. Lëë Dios kwnabey nii singo kako. Lëë nii kwlootsey Dios kok ndoon parñee kchë meñ kniladzyo ni kuuñtsyeyo.

<sup>27</sup> ¡Lëësy Dios nyaani! ¡Lo xaa kol tsoo ktee no skizh tugak por Jesucrist! Amén.

**Tiits nii xnee kyalmbañ; El Nuevo  
Testamento en el zapoteco de Quioquitani  
New Testament in Zapotec, Quioquitani-Quierí  
(MX:ztq:Zapotec, Quioquitani-Quierí)**

copyright © 2009 Wycliffe Bible Translators, Inc.

Language: Zapotec, Quioquitani-Quierí

Translation by: Wycliffe Bible Translators, Inc.

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Quioquitani-Quierí

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files  
dated 29 Jan 2022

b875d83b-1345-50dd-9fb2-879c17bf285a